




Selasa, 13 Oktober 2020
Ogen: 2 Samuel 13: 12-20



Ndele Ate



Ndele ate mungkin banci ndeher ras si ikataken stress. Stress enda banci reh katawari pe, janah i bas situasi si ugapanape. Stress banci mabai sakalak lanai bersih rukur janah jadi pelupa. Ternyata adi terjadi stress i bas dirinta, otot jantung berpacu lebih kencang emaka syaraf pe terganggu jadinya. Selaku Moria, tuhu melala si iukurken kita guna sidahiken, maun si akap adi la si dahiken labo kari sikap. Emaka, banci jadi i bas kita, asum kita napui, ukur nggo nggosok, tupung kita nggosok ukurta erdakan. Kita ngasup ngukuri si lenga jadi/lenga idahiken. Tapi adi la terkelola i bas pikirenta, enda me si banci mahanca kita stress.

I bas oratenta sendah, enggo ilakoken Amnon me perbahanen si jahat (iperkosana) Tamar (turangna). Amnon anak Daud i bas Ahinoam (nandena) janah Tamar anak Daud i bas Maakha (nandena). Kenca kejadi si e tuhu-tuhu lanai lit erga Tamar selaku diberu, sabap ipelawes Amnon ka ia. Ndele kal ate Tamar enda ngukuri kecibalna, icaburina takalna alu abu, icaingkenna baju panjangna ngandung kal ia lawes. Icaburken abu ku takal e gambaren ceda ate, sedak kal bas pusuh, kecewa, dem penyesalen, lanai tempa lit arapen masa depan si terulin. Alu tangis lawes Tamar ku rumah turangna si sada nande ras ia eme Absalom. Kenca ieteh Absalom kai si jadi man turangna e, emaka nina “ola ndele atendu.” Teridah maka turangna Absalom ngapuli Tamar, janah iajarina gelah tetap semangat, isuruhna tading i rumahna, isuruhna pe gelah Tamar empesikap bana, ridi ras ngganti baju si enggo rigat, encidahken maka ia sekalak diberu putri kerajan. Ertina ula ndekahsa Tamar rate ceda, lit denga nge masa depanna ku si terulin. Adina litlah si ngapulisa, tentu reh nahangna kap ukur amin gia idenden persoalen. Tapi, adina rembang la lit teman si mereken pergegeh dengen ngapulisa, je banci tambah beratna pusuh.

Adi kune lit persoalen si erbahansa ndele kal ateta, siturikenlah man ise si akap banci kita nuri-nuri, sabap bas kita nuri-nuri e, setengah beban pusuh e enggo ndarat, si darami ka ingan si teneng ndauh i bas keteremen, i je kita nuri-nuri man Dibatan. Kenca sie aturlah nafas manjar-anjar gelah pusuh pe teneng, beneken pemikiran si ngganggu, janah bayangken si mehuli alu nutup mata.